

佛言此陀羅尼有大勢力。至心誦持必當自證。能令枯樹生華。何況世間果報。若常誦持水火刀兵怨家毒藥皆不能害。若卒為鬼神傷死。結印誦呪七遍。以印印心皆令却活。舍宅不安鬼神作禍。呪土四塊鎮之即去

佛言若人六親不和。不相愛念。依法誦呪所向和合。聞名見身皆生歡喜。凡所求無不遂心。況能結齋具戒。一心清淨依法誦持。不轉此身即證菩提有大功力

佛言若人欲長生。於古塔及深山中。或淨房內依鏡為壇。具滿二四六十萬遍。青蓮華和安悉香燒。於睡夢中夢食仙藥。或授仙方或於鏡中有五色光。光中有藥隨意取食。即得長生

佛言若依法誦持一心精勤。功力說不可盡。此壇鏡法不得人見。若見即不好不成。須密之此法不可說自當證知。隨意所求速得成就受勝妙樂

七佛俱胝佛母心大準提陀羅尼法

一校畢

慈順